



Ilis Cusseglers dals chantuns Stefan Engler (PCD) e Martin Schmid (PLD) fan comunablamain cumbat electoral.

KEYSTONE

## Sco «duo» en il cumbat electoral

■ (rtr) Il liberaldemocrat Martin Schmid ed il cristiandemocrat Stefan Engler fan in cumbat electoral cuminaivel. Dentant er sch'els èn enfin uss ils sulets candidats che candideschan per in'ulteriura perioda en il cussegl dals chantuns, vulan els prender serius las elecziuns. Ilis cussegliers dals chantuns Stefan Engler (pcd) e Martin Schmid (pld) fan comunablamain cumbat electoral.

Els na vulan betg vegnir elegids mo perquai ch'els n'han enfin uss nagins cuntra-candidats. «Mabain sin fundament da nossa lavur che nus avain fatg durant ils davos quatter onns a Berna», di Martin Schmid. Per exempel hajan els

gudagnà influenza en il cussegl dals chantuns cun sa posiziunar en las cumissiuns. Martin Schmid è tranter auter en la cumissiun da gestiun ed en la cumissiun per ambient, planisaziun dal territori ed energia. Stefan Engler è tranter auter en la cumissiun da las instituziuns politicas ed en la cumissiun per dumondas giuridicas. Tuts dus èn er en la cumissiun per economia e taxas.

Quai sajan impurtantas cumissiuns per il chantun Grischun che haja da cumbatter cun las consequenzas da l'iniziativa da las segundas abitaziuns, cun in turissem flaivel e cun plazzas da lavur periclitadas. Tema ch'i dess da la PPS anc ina terza candidatura per il cussegl dals

chantuns n'han Engler e Schmid betg, dentant respect: «Adina sch'igl ha dapli candidats che posts datti tals che sperdan, ed jau na less betg esser tar quels, uschè ch'igl è da prender serius. Dentant èsi natiralmain legitim che mintga partida po er preschentar candidats», di cusseglier dals chantuns Stefan Engler.

### Turnea cumenza

Durant ina pitschna turnea s'entaupa il duo burgais en differents lieus dal chantun cun la populaziun. Oz cumenza la tura a Glion. Alura suondan visitas a Cuira, San Murezzan, Tavau, Tusaun ed en la Mesolcina.